

絕妙好詞箋

附詞選

冊三

卷之二

三

絕妙好詞箋卷六

弁陽老人周密原輯

宛平查為仁  
錢唐厲鶚同箋

李彭老

彭老字商隱號箕房景定建康志李彭老淳祐  
中沿江制置司屬官

木蘭花慢

正千門繫柳。賜宮燭。散青煙。看秀靨芳唇。塗妝暈色。  
試盡春妍。田田滿階榆莢。弄輕陰。淺冷似秋天。隨處  
錫香杏暖。燕飛斜。鞦韆。朱絃幾換華年。扶淺醉。  
落紅前。記舊時游冶。燈樓倚扇。水院移船。吟邊夢雲

飛遠有題紅。都在薛濤牋。聽絕殘簫倦笛。夜堂明月  
窺簾。

壺中天 登寄閒吟臺

青飈蕩碧。喜雲飛寥廓。清透涼宇。倦鵲驚翻臺榭迴。  
葉葉秋聲歸樹。珠斗斜河。冰輪輾霧。萬里青冥路。薌  
深屏翠。桂邊滿袖風露。煙外冷逼玻璃。漁郎歌杳。  
擊空明歸去。怨鶴知更蓮漏悄。竹裏篩金簾戶。短髮  
吹寒。閒情吟遠。弄影花前舞。明年今夜。玉樽知醉何  
處。

高陽臺 落梅

飄粉杯寬。盛香袖小。青青半掩苔痕。竹裏遮寒。誰念  
減盡芳雲。么鳳叫晚吹晴雪。料水空烟冷西泠。感凋  
零。殘縷遺鈿。迤邐成塵。東園曾趁花前約。記按箏  
籌酒。戲挽飛瓊。環珮無聲。草暗臺榭春深。欲倩怨笛  
傳清譜。怕斷霞難返吟魂。轉銷凝。點點隨波。望極江  
亭。

法曲獻仙音官圃賦梅繼草窗韻

雲木槎枒。水萍搖落。瘦影半臨清淺。翠羽迷空。粉容  
羞曉。年華柱絃頻換。甚何遜。風流在。相逢共寒晚。  
總依黯。念當時看花游冶。曾錦纜移舟。寶箏隨輦。池

苑鎖荒涼。嗟事逐鴻飛。天遠香徑無人。甚蒼蘚黃塵。  
自滿。聽鴉嗁春寂。暗雨蕭蕭吹怨。

一萼紅寄弁陽翁

過薔薇。正風喧雲澹。春去未多時。古岸停橈。單衣試  
酒。滿眼芳草斜暉。故人老。經年賦別。鐙暈裏相對夜  
何其。泛剡清愁。買花芳事。一卷新詩。流水孤帆漸  
遠。想家山猿鶴。喜見重歸。北阜尋幽。青津問釣。多情  
楊柳依依。最難忘。吟邊舊雨。數菖蒲。老是來期。幾夕  
相思。夢蜨飛繞蘋溪。蘇案喧當作暄

高陽臺寄題蓀壁山房

石筍埋雲。風篁嘯晚。翠微高處幽居。縹緲雲籤。人間  
一點塵無。綠深門戶。嘯鶻外。看堆牀寶晉圖書。儘蕭  
閒。浴硯臨池。滴露研朱。舊時曾寫桃花扇。弄霏香  
秀筆。春滿西湖。松菊依然。柴桑自愛吾廬。冰絃玉麈  
風流在。更秋蘭香染衣裾。照窗明。小字珠璣。重見歐  
虞。

佩楚軒客談云金應桂字一之雅標度能歐書  
受知賈似道居西湖南山中築蓀壁山房左設  
右壺中設圖史客至撫摩諦玩清談纏纏每肩  
輿入城府幅巾氅衣望之若神仙然

探芳訊湖上春遊繼草窗韻

對芳晝甚怕冷添衣。傷春疏酒。正緋桃如火。相看自  
依舊。閒簾深掩梨花雨。誰問東陽瘦。幾多時。漲綠鶯  
枝。墮紅鴛鴦。隄上寶鞍驟。記草色薰晴。波光搖岫。  
蘇小門前。題字尙存否。繁華短夢隨流水。空有詩千  
首。更休言。張緒風流似柳。

祝英臺近

杏花初。梅花過。時節又春半。簾影飛梭。輕陰小庭院。  
舊時月底鞦韆吟香醉玉。曾細聽歌珠一串。忍重  
見。描金小字題情。生綃合歡扇。老了劉郎。天遠玉簫



伴幾番鶯外斜陽。欄杆倚徧。恨楊柳遮愁不斷。

蹋莎行題草窗十擬後

紫曲迷香。綠窗夢月。芳心如對春風說。蠻牋象管寫  
新聲。幾番曾試瓊壺缺。一作缺庾信書愁。江淹賦  
別。桃花紅雨梨花雪。周郎先自足風流。何須更擬秦  
笙咽。

浪淘沙

潑火雨初晴。草色青青。傍簷垂柳賣春錫。畫舫載花  
花解語。縮燕吟鶯。簫鼓入西泠。一片輕陰。鈿車羅  
蓋競歸城。別有水窗人喚酒。弦月初生。

四字令

蘭湯晚涼。鸞釵半妝。紅巾膩雪吹香。擘蓮房賭雙。  
羅紈素璫。冰壺露牀。月移花影西廂。數流螢過牆。

生查子

羅襦隱繡茸。玉合銷紅豆。深院落梅鈿。寒峭收燈後。  
心事卜金錢。月上鵝黃柳。拜了夜香休。翠被聽春漏。

詞旨屬對紫曲迷香綠窗夢月暗雨敲花柔風

過柳

警句明年今夜玉尊知醉何處壺中天閒簾深

掩梨花雨誰問東陽瘦探芳訊幾番鶯外斜陽  
闌干倚徧恨楊柳遮愁不斷祝英臺近

樂府補題李彭老天香賦龍涎香云搗麝成  
塵薰薇注露風酣百和花氣品重雲頭葉翻  
蕉樣共說內家新製波浮海沫誰喚覺鮫人  
春睡清潤俱饒片腦芬氲半是沈水相逢酒  
邊雨外火初溫翠爐香細不似寶珠金縷領  
巾紅墜荀令如今憔悴銷未盡當時愛香意  
燼煖鐙寒秋聲素被摸魚兒賦尊云過垂虹  
四橋飛雨沙痕初漲春水鯉波十里吳歛遠

綠蔓半縈船尾連復碎愛滑卷青綃香裊冰  
絲細山人雋味笑杜老無情香羹碧澗空祇  
賦芹美歸期早誰似季鷹高致鱸魚相伴菘  
米紅塵如海邱園夢一葉又秋風起湘湖外  
看采擷芳條際曉隨魚市舊游漫記但望裏  
江南秦鬟賀鏡渺渺隔煙水

吳文英夢窗乙稿絳都春爲李貧房量珠賀  
云情黏舞線悵駐馬灞橋天寒人遠旋翦露  
痕移得春嬌栽瓊苑流鶯浪語煙中怨恨三  
月飛花零亂豔陽歸後紅藏翠掩小坊幽院

誰見新腔按徹背燈暗共倚篔簹屏蔥蒨繡被  
夢輕金屋裝深沈香換梅花重洗春風面正  
溪上參橫月轉並禽飛上金沙瑞香霧煖

### 李萊老

萊老字周隱號秋崖新定續志嚴州知州李萊  
老咸淳六年任

### 惜紅衣寄弁陽翁

笛送西泠帆過杜曲晝陰芳綠門巷清風還尋故人  
書屋蒼華髮冷笑瘦影相看如竹幽谷煙樹曉鶯訴  
經年愁獨殘陽古木書晝歸船怱怱又南北贛洲

鷗鷺素熟舊盟續。甚日浩歌招隱。聽雨弁陽同宿。料  
重來時候。香蕩幾灣紅玉。

青玉案草窗詞卷

吟情老盡江南句。幾千萬垂絲縷。花冷絮飛寒食路。  
漁煙鷗雨。燕昏鶯曉。總入昭華譜。紅衣妝靚涼生  
渚。環碧斜陽舊時樹。拈葉分題觴詠處。荀香猶在。庾  
愁何許。雲冷西湖賦。

揚州慢瓊花次韻

玉倚風輕。粉凝冰薄。土花祠冷無人。聽吹簫月底。傳  
暮草金城。笑紅紫紛紛成雨。遡空如蝶。肯墮珠塵。嘆

而今杜郎還見應賦悲春。佩環何許縱無情。鶯燕

猶驚。悵朱檻香銷。綠屏夢杳。腸斷瑤瓊。九曲迷樓。依舊沈沈。夜想覓行雲。但荒煙幽翠。東風吹作秋聲。

山房隨筆云揚州瓊花天下祇一本士大夫愛

重作亭花側榜曰無雙德祐乙亥北師至花遂  
不榮趙棠國炎有絕句弔曰名擅無雙氣色雄  
忍將一死報東風他年我若修花史合傳瓊妃

烈女中

### 謁金門

春意態。閒卻遠山橫黛。香徑莓苔嗟粉壞。鳳鞞雙鬪

綵。折得花枝嬾戴。猶戀鴛鴦飛蓋。舊恨新愁都只在。東風吹柳帶。

浪淘沙

榆火換新煙。翠柳朱簷。東風吹得落花顛。簾影翠梭懸繡帶。人倚鞦韆。猶憶十年前。西子湖邊。斜陽催入畫樓船。歸醉夜堂歌舞月。拚卻春眠。

生查子

妾情歌柳枝。郎意憐桃葉。羅帶綰同心。誰信愁千結。樓上數殘更。馬上看新月。繡被怨春寒。怕學鴛鴦

疊。



高陽臺落梅

門掩香殘。屏搖夢冷。珠鈿糝綴芳塵。臨水牽花。流來  
疑是行雲。蘇梢空挂淒涼月。想鶴歸猶怨黃昏。黯銷  
凝。人老天涯。鴈影沈沈。斷腸不在聽橫笛。在江皋  
解珮。翳玉飛瓊。煙溼荒村。背春無限愁深。迎風點點  
飄寒粉。悵秋孃滿袖。嘒痕更關情。青子懸枝。綠樹成  
陰。

木蘭花寄題蓀壁山房

向煙霞堆裏著吟屋。最高層。望海日翻紅。林霏散白。  
猿鳥幽深。雙岑倚天翠溼。看浮雲收盡。雨還晴。曉色